

156. löggjafarþing 2025.
Þingskjal x — x. mál.
Stjórnarfrumvarp.

Frumvarp til laga

um breytingu á lögum um fæðingar- og foreldraorlof, nr. 144/2020 (fjölburaforeldrar og veikindi á meðgöngu)

Frá félags- og húsnæðismálaráðherra.

1. gr.

Eftirfarandi breytingar verða á 15. gr. laganna:

- a. Í stað orðsins „þrjá“ í 1. mgr. kemur: sex.
- b. Í stað orðsins „þrjá“ í 2. mgr. kemur: sex.

2. gr.

Eftirfarandi breytingar verða á 18. gr. laganna:

- a. Eftirfarandi breytingar verða á 1. mgr.:
 1. Á eftir orðunum „í tengslum við“ kemur: meðgönguna eða.
 2. Á eftir orðunum „veikindin rakin til“ kemur: meðgöngunnar eða.
- b. Fyrirsögn greinarinnar orðast svo: *Veikindi foreldris í tengslum við meðgöngu eða fæðingu barns.*

3. gr.

Eftirfarandi breytingar verða á 34. gr. laganna:

- a. Í stað orðsins „þrjá“ í 1. mgr. kemur: sex.
- b. Í stað orðsins „þrjá“ í 2. mgr. kemur: sex.

4. gr.

Eftirfarandi breytingar verða á 35. gr. laganna:

- a. Eftirfarandi breytingar verða á 1. mgr.:
 1. Á eftir orðunum „í tengslum við“ kemur: meðgöngu eða.
 2. Á eftir orðunum „veikindin rakin til“ kemur: meðgöngunnar eða.
- b. Fyrirsögn greinarinnar orðast svo: *Veikindi foreldris í tengslum við meðgöngu eða fæðingu barns.*

5. gr.

Lög þessi öðlast gildi 1. júlí 2025 og eiga við um foreldra sem rétt eiga til greiðslna samkvæmt lögum þessum.

Greinargerð.

1. Inngangur.

Í stefnuýfirlýsingu ríkisstjórnar Samfylkingar, Viðreisnar og Flokks fólksins frá 21. desember 2024 kemur meðal annars fram að ríkisstjórnin hafi í hyggju að gera breytingar á fæðingarorlofskerfinu til að styrkja afkomuöryggi fjölskyldna. Fram kemur að í því sambandi muni ríkisstjórnin meðal annars bæta hag fjölburaforeldra og þeirra sem veikjast í kjölfar fæðingar eða á meðgöngu.

Með frumvarpinu eru lagðar til breytingar sem eru liður í því að styrkja enn frekar fæðingarorlofskerfið hér á landi, meðal annars í því skyni að stuðla að betra jafnvægi milli atvinnuþátttöku foreldra og fjölskyldulífs.

2. Tilefni og nauðsyn lagasetningar.

Tilefni þykir til að auka rétt innan fæðingarorlofskerfisins fyrir foreldra sem fætt hafa barn í þeim tilvikum þegar foreldri glímir við veikindi í tengslum við meðgöngu eftir að barnið er fætt. Þykja rök þannig standa til þess að hið sama gildi hvað varðar rétt foreldris sem fætt hefur barn til fæðingarorlofs sem og fæðingarstyrks hvort sem alvarleg veikindi foreldrisins eru rakin til meðgöngunnar eða fæðingarinnar þegar veikindin verða til þess að foreldrið er ófært um að annast barn sitt í fæðingarorlofi. Er því lagt til að réttur til lengra fæðingarorlofs sem og aukins fæðingarstyrks vegna alvarlegra veikinda á meðgöngu sem vara fram yfir fæðingu barns verði tryggður innan fæðingarorlofskerfisins á sama hátt og réttur foreldris sem fætt hefur barn er tryggður vegna alvarlegra veikinda sem koma til vegna fæðingar barnsins.

Einnig þykir tilefni til að bæta hag fjölburaforeldra, ekki í síst í ljósi þess að meðganga og fæðing fjölbura kann á margan hátt að vera frábrugðin meðgöngu og fæðingu einbura auk þess sem ljóst þykir að fjölburum kunni að fylgja aukið álag fyrir foreldra. Er því lagt til að sameiginlegur réttur fjölburaforeldra til fæðingarorlofs sem og fæðingarstyrks verði aukinn enn frekar.

3. Meginefni frumvarpsins.

Með frumvarpinu er lagt til að aukinn réttur til fæðingarorlofs sem og aukinn réttur til fæðingarstyrks vegna fjölburaafæðinga verði aukinn enn frekar þannig að foreldrar eigi sameiginlegan rétt á lengingu fæðingarorlofs eða greiðslu fæðingarstyrks í sex mánuði fyrir hvert barn umfram eitt sem fæðist lifandi. Einnig er lagt til að foreldrar sem frumættleiða eða taka í varanlegt fóstur fleiri börn en eitt á sama tíma eigi sameiginlegan rétt á lengingu fæðingarorlofs eða greiðslu fæðingarstyrks í sex mánuði fyrir hvert barn umfram eitt.

Með frumvarpinu er einnig lagt til að heimilt verði að lengja fæðingarorlof foreldris sem fætt hefur barn um allt að tvo mánuði vegna alvarlegra veikinda foreldrisins í tengslum við meðgönguna, enda verði veikindin rakin til meðgöngunnar og foreldrið hafi af þeim völdum verið ófært um að annast barn sitt í fæðingarorlofi. Gert er ráð fyrir að hið sama eigi við hvað varðar rétt foreldra sem fætt hafa barn til fæðingarstyrks samkvæmt lögunum.

4. Samræmi við stjórnarskrá og alþjóðlegar skuldbindingar.

Frumvarpið þykir ekki fela í sér álitafni sem kalla á sérstaka umfjöllun um samræmi við stjórnarskrá eða alþjóðlegar skuldbindingar.

5. Samráð.[í vinnslu]

Frumvarp þetta var unnið í félags- og vinnumarkaðsráðuneytinu. Áform um gerð frumvarpsins voru kynnt öðrum ráðuneytum í samræmi við verklag í tengslum við innra samráð Stjórnarráðsins.

Áform um frumvarpið voru kynnt í samráðsgátt stjórnvalda á vefnum Ísland.is frá og með 4. febrúar 2025 og var veittur frestur til og með 18. febrúar 2025 til að veita umsagnir um drögin (mál nr. S-18/2025). Alls bárust fjórar umsagnir frá áformin.

Drög að frumvarpinu voru kynnt í samráðsgátt stjórnvalda á vefnum Ísland.is frá og með 19. febrúar 2025 og var veittur frestur til og með 5. mars 2025 til að veita umsagnir um drögin (mál nr. S-xx/2025).

6. Mat á áhrifum.

Efni frumvarpsins á við um foreldra barna sem fæðast, eru ættleidd eða tekin í varanlegt fóstur. Vinnumálastofnun fer með framkvæmd laga um fæðingar- og foreldraorlof og annast stofnunin umsýslu í tengslum við Fæðingarorlofssjóð. Við mat á áhrifum frumvarpsins er því meðal annars byggt á upplýsingum og gögnum frá Vinnumálastofnun, þar með talið tölulegum upplýsingum um nýtingu foreldra á rétti þeirra til fæðingarorlofs.

Samkvæmt tölulegum upplýsingum frá Vinnumálastofnun nýta mæður í ríkari mæli en feður sameiginlegan rétt foreldra til fæðingarorlofs. Þá er ljóst að nánast undantekningalaust eru það konur sem ganga með og fæða börn. Má því ætla að frumvarpið hafi meiri áhrif á konur en karla.

Gert er gert ráð fyrir að árleg fjárhagsáhrif á ríkissjóð verði um 115 til 162 millj. kr.

*Um einstakar greinar frumvarpsins.**Um 1. gr.*

Í 15. gr. laganna er kveðið á um aukinn rétt til fæðingarorlofs vegna fjölburafæðinga. Er þannig kveðið á um að foreldrar eigi sameiginlegan rétt á lengingu fæðingarorlofs um þrjá mánuði fyrir hvert barn umfram eitt sem fæðist lifandi. Þá er í ákvæðinu kveðið á um að foreldrar sem frumættleiða eða taka í varanlegt fóstur fleiri börn en eitt á sama tíma eigi sameiginlegan rétt á lengingu fæðingarorlofs um þrjá mánuði fyrir hvert barn umfram eitt.

Hér er lagt til að aukinn réttur til fæðingarorlofs vegna fjölburafæðinga verði aukinn enn frekar þannig að foreldrar eigi sameiginlegan rétt á lengingu fæðingarorlofs um sex mánuði fyrir hvert barn umfram eitt sem fæðist lifandi. Einnig er lagt til að foreldrar sem frumættleiða eða taka í varanlegt fóstur fleiri börn en eitt á sama tíma eigi sameiginlegan rétt á lengingu fæðingarorlofs um sex mánuði fyrir hvert barn umfram eitt.

Um nánari skýringar hvað þetta varðar vísast til umfjöllunar í kafla 2.

Um 2. gr.

Í 18. gr. laganna er kveðið á um að heimilt sé að lengja fæðingarorlof foreldris sem fætt hefur barn um allt að tvo mánuði vegna alvarlegra veikinda foreldrisins í tengslum við fæðinguna enda verði veikindin rakin til fæðingarinnar og foreldrið hafi af þeim völdum verið ófært um að annast barn sitt í fæðingarorlofi sínu að mati sérfræðilæknis.

Hér eru lögð til þau nýmæli að einnig verði heimilt að lengja fæðingarorlof foreldris sem fætt hefur barn um allt að tvo mánuði vegna alvarlegra veikinda foreldrisins í tengslum við meðgönguna, enda verði veikindin rakin til meðgöngunnar og foreldrið hafi af þeim völdum verið ófært um að annast barn sitt í fæðingarorlofi. Er þetta lagt til þar sem mikilvægt þykir að aukinn réttur til fæðingarorlofs vegna alvarlegra veikinda í tengslum við meðgöngu verði

tryggður með sama hætti og vegna alvarlegra veikinda í tengslum við fæðingu. Þykja rök þannig standa til þess að hið sama gildi hvað varðar rétt foreldris sem fætt hefur barn til fæðingarorlofs hvort sem alvarleg veikindi foreldrisins eru rakin til meðgöngunnar eða fæðingarinnar þegar veikindin verða til þess að foreldrið er ófært um að annast barn sitt í fæðingarorlofi.

Þá er gert ráð fyrir að fyrirsögn greinarinnar verði breytt til samræmis við þær breytingar sem lagðar eru til á efni greinarinnar.

Um 3. gr.

Í 34. gr. laganna er kveðið á um aukinn rétt til fæðingarstyrks vegna fjölburafæðinga. Er þannig kveðið á um að foreldrar eigi sameiginlegan rétt til fæðingarstyrks í þrjá mánuði fyrir hvert barn umfram eitt sem fæðist lifandi. Þá er í ákvæðinu kveðið á um að foreldrar sem frumættleiða eða taka í varanlegt fóstur fleiri börn en eitt á sama tíma eigi sameiginlegan rétt til fæðingarstyrks í þrjá mánuði fyrir hvert barn umfram eitt.

Hér er lagt til að aukinn réttur til fæðingarstyrks vegna fjölburafæðinga verði aukinn enn frekar þannig að foreldrar eigi sameiginlegan rétt til fæðingarstyrks í sex mánuði fyrir hvert barn umfram eitt sem fæðist lifandi. Einnig er lagt til að foreldrar sem frumættleiða eða taka í varanlegt fóstur fleiri börn en eitt á sama tíma eigi sameiginlegan rétt til fæðingarstyrks í sex mánuði fyrir hvert barn umfram eitt.

Um nánari skýringar hvað þetta varðar vísast til umfjöllunar í kafla 2.

Um 4. gr.

Í 35. gr. laganna er kveðið á um að heimilt sé að er að lengja rétt foreldris sem fætt hefur barn til fæðingarstyrks um allt að tvo mánuði vegna alvarlegra veikinda foreldrisins í tengslum við fæðinguna enda verði veikindin rakin til fæðingarinnar og foreldrið hafi af þeim völdum verið ófært um að annast barn sitt í fæðingarorlofi sínu að mati sérfræðilæknis.

Hér eru lögð til þau nýmæli að einnig verði heimilt að lengja rétt foreldris sem fætt hefur barn til fæðingarstyrks um allt að tvo mánuði vegna alvarlegra veikinda foreldrisins í tengslum við meðgönguna, enda verði veikindin rakin til meðgöngunnar og foreldrið hafi af þeim völdum verið ófært um að annast barn sitt í fæðingarorlofi. Er þetta lagt til þar sem mikilvægt þykir að aukinn réttur til fæðingarstyrks vegna alvarlegra veikinda í tengslum við meðgöngu verði tryggður með sama hætti og vegna alvarlegra veikinda í tengslum við fæðingu. Þykja rök þannig standa til þess að hið sama gildi hvað varðar rétt foreldris sem fætt hefur barn til fæðingarstyrks hvort sem alvarleg veikindi foreldrisins eru rakin til meðgöngunnar eða fæðingarinnar þegar veikindin verða til þess að foreldrið er ófært um að annast barn sitt í fæðingarorlofi.

Þá er gert ráð fyrir að fyrirsögn greinarinnar verði breytt til samræmis við þær breytingar sem lagðar eru til á efni greinarinnar.

Um 5. gr.

Gert er ráð fyrir að þær breytingar sem lagðar eru til með frumvarpi þessu öðlist gildi 1. júlí 2025 og eigi við um foreldra sem eiga rétt til greiðslna samkvæmt lögunum. Er þannig gert ráð fyrir að breytingarnar eigi við um alla foreldra sem eiga ónýtt réttindi innan fæðingarorlofskerfisins 1. júlí 2025 óháð því hvenær börn fæðast, eru ættleidd eða tekin í varanlegt fóstur